



*Jumat, 21 Oktober 2022*

**Ogen: Galati 2:20**



**Kristus Si Nggeluh I Bas Aku**



\\ Kecerdasan adalah kemampuan beradaptasi terhadap perubahan” (Steven Hawking). Lit sekali percakapan i bas gereja kerna musik si ipake tupung kebaktin. I je hadir anak PERMATA mindo gelah bahan min musik kraeatif i bas kebaktin gereja, gelah nambahi semangat anak si nguda reh ku gereja, apai ka adi ilibatkan ia i bas musik e. Tapi nina serayan i bas gereja e, 'ena labo perlu, gerejanta GBKP enda ibadahna arus teneng. Ula peseri ras gereja kalak ah.' Bagenda me ciri gereja si la ngasup beradaptasi ras situasi si man alanken. Jaman enda tentuna berubah apaika kenca tehnologi digital si genduari. Pedas kal iformasi seh man banta megati lanai pe kita ngasup ngikutisa kerina. Tapi perlu kal kita beradaptasi ras situasi si gundari. Perlu kita pentar milihsa si apai cocok ras pelayanen, si apai ka si man tadingenken.

I bas ndalani kegeluhenna selaku pemimpin agama, Paulus nggit ipelambarui. La ipertahankenna kiniteken ras pemetehna si ndekah. Adi nai ia bali ras guru-guru agama kalak Jahudi ras ahli Taurat. Undang-undang Taurat akapna si payona, patuh man Undang-undang Taurat me akapna si erbahansa ia terkelin. Si la ndalanken undang-undang Taurat akapna e najis ras kafir. Tapi kenca jumpa ia ras Jesus, nggit ia ngaloken pengajaren Jesus e. Lanai iikutkenna pengangkan ras kinitekenna si gelgel. Kerna keselamatan labo erkiteken patuh ndalanken undang-undang tapi erkiteken perkuah ate Kristus. Keselamatan e labo arah usaha manusia tapi erkiteken perkah ate si mbelin. Janah kinitekenna si genduari e me si ipembarkenna man kerina jelma i sekelewetna. E maka nina, 'lanai aku si nggeluh, tapi Kristus kap si nggeluh i bas aku. Kegeluhenna si genduari e i bas doni enda kugeluhken erkiteken Anak Dibata si engkelini aku dengen si ngendesken dirina man gunangku.' Teridah Paulus nggit ngikuti perubahan ras ia jine pe nggit robah. I bas minggu-minggu reformasi enda ipersinget kita nggit mereformasi diri subuk cara rukur, cara ngerana, erdahin terlebih kinitekennta.